

Prouvènço nostro
Lou jacoubinisme parisen, à court d'alén, vai
belèu descentralisa lou païs... (pajo 2)



Prouvènço d'aro

Tóuti li mes, lou journau de la Prouvènço d'aro

Juliet-avoust de 2020

n° 367

2,10 €

ITER

Un souleiet sus Terro
 Estagiàri en coumunicacioun.

Ai l'ounour de vous assabenta que lou segound vòlume dóu manga sus ITER que vèn d'espeli sus lou site de l'agènci japouneso d'ITER: http://www.fusion.qst.go.jp/ITER/comic/page1_1.html
 Déurié pas tarda à èstre publica sus lou site d'ITER tambèn (<https://www.iter.org/fr/news/publicationcentre>, ounglet BD). Vous lou farai assaupre.
 Se pòu telecarga d'à gratis sus lou site japounès çai-subre.

T. C.

Vaqui tout bèn just la presentacioun di persounage pèr vous dona l'envejo de la legi... (20 pajo, reviraduro de Terris Cerisier).

Taiyo Tenno - Es estudiant dis art, à mand de davera soun diplomo, e que coumenço de cerca un emplé. Es un esperit libre e dubert, forço curious de tout e barbelant d'exploura de mounde incouneigu. Passo si vacanço d'estiéu dins lou miejour de Franço coume estagiàri à-n-ITER.



Souleano - Es uno cercairis prouvençalo que trabaio à-n-ITER à Sant-Pau de Durènço. Rèsto à l'ouro d'aro à-z-Ais. Es elo que desvihè l'interès de Taiyo pèr ITER quouro se rescountrèron un an en-ça.

Eisuke Tada (dins soun propre role) - Es lou Direitour Generau Ajoun d'ITER, un di sèt piounié dóu prougramo ITER. Pòu èstre forço estré, mai pren siuen de sis emplega. A rescountra Taiyo pèr lou biais de Souleano.

Lis àutris estagiàri - Dous estagiàri d'ITER, qu'an coumença en meme tèms que Taiyo. Pèr aquéli que l'an pas vist, FR-Vaqui a counsacra uno de sis emessioun à ITER ounte Terris nous fai vesita lou Cèntre gigantas. Es toujour vesible dins lis archiéu de *Vaqui* au 8 de desèmbre 2019.

Terris a tambèn après à sis estagiàri à parla prouvençau en cours dóu sér...

Lou castèu de La Barben



Lou castèu de La Barben, quiba sus sou roucas, es situï sus la coumuno de La Barben proche Pelissano.

Dins lou cartulàri de l'abadié de Sant-Vitour de Marsiho, lou *castrum* de La Barben es adeja menciona en 1009. Couneissèn pas eisatamen sa dato de bastisoun, seguramen avans l'an 1000.

Fuguè la proupieta de la famiho Pontevès, grando famiho prouvençalo de la parentèlo de Nostradamus.

Au siècle XV^{en} apartèn au bon Rèi Reinié que lou vènd en 1474 à Jan II de Forbin, fraire de Palamède de Forbin, di lou Grand (Marsiho, 1433 - Ais de Prouvènço, 1508), , que fuguè grand-senechau, gouvèrnour e liò-

tenènt-generau de Prouvènço mai que faguè la reünion de Prouvènço à la Courouno de Franço en 1482.

Lou castèu restè la proupieta di marqués de Forbin quasimen 500 an de tèms. Lou 4 novèmbre 1630, subiguè gravamen la revòuto di Cascavèu (rebelioun contro Richelieu).

La princesso Paulino Borghèse (sorre de Napoléon) ié faguè quàuqui galipeto emé Aguste de Forbin.

En 1963, lou nouvèu proupietàri, Andriéu Pons, engeniaire agricolo, ié restè emé sa famiho e lou durbiguè au public tre 1965. En 1971, creè lou zouò de La Barben. Sis enfant ié restèron encaro enjusqu'à la barraduro dóu zouò.

Lou 31 de desèmbre 2019, lou castèu es vendu à Vianney Audemard d'Alançon, qu'es tambèn d'uno vièio famiho prouvençalo.

Lou castèu e lou jardin fuguèron classa monument historique en 1984.

Es lou mai ancian castèu de Prouvènço.

Li jardin dóu castèu soun, se dis, li mai bèu de Prouvènço. Fuguèron dessina pèr Andriéu Le Nôtre, creatour di jardin dóu Castèu de Versaio.

Es un jardin à la franceso, regulié, emé dos pusterlo d'intrado, uno alèio de platano, un dessin bèn ourganisa emé de porge, uno ribiero, quatre bacin, dos font, de terrasso...

De segui pajo 11

Carl Rogers e la persouno

L'aubre bestort viéu plan-planet sa vido, mai l'aubre dre finis en post...

Pajo 3

Un chale dóu tèms di fado

N'en vaqui un afaire tihous, que de parla de la musico...

Pajo 6

Lou castèu de La Barben

Lou nouvèu castelan a trouba sa plaço, Vianney Audemard d'Alençon...

Pajo 11